

Islamski Da'wetski Web Portal

ET-TAQWA



www.et-taqwa.com

2014



KAKO UČITI KUR'AN NAPAMET?

Naslov brošure:

**KAKO UČITI KUR'AN NAPAMET
PROPISI I PRAVILA UČENJA KUR'ANA - HIFZA**

Autor:

AbdulMusin El-Kasim

Šerijatska recenzija:

Ebu Talha

Lektor:

Ebu Talha

Štampa:

2014

Prijevod:

Hajrudin Ahmetović

Dizajn korice:

Safet Suljić

Izdavač:

ET-TAQWA

Tiraž:

WEB IZDANJE

**KAKO UČITI KUR'AN
NAPAMET
PROPISI I PRAVILA UČENJA KUR'ANA
„HIFZA“**

AUTOR:

AbdulMusin El-Kasim



© Copyright: ET-TAQWA – Safet Suljić. Sva prava pridržana.

Ovu knjigu je **DOZVOLJENO** reprodukovati ili emitovati na bilo koji način, elektronski ili mehanički, uključujući fotokopiranje, snimanje ili bilo koji drugi sistem za bilježenje, uz sljedeće uslove:

- 1) ne smije se koristiti u profitabilne svrhe;
- 2) u slučaju korištenja materijala obavezno je spomenuti izvor i vlasnika prava;
- 3) prilikom prenošenja tekst mora zadržati svoj kontekst.

Izražavamo najiskreniju zahvalu svakom onom ko na bilo koji način doprinese distribuciji ove knjige. Neka ga Allah Uzvišeni nagradi za njegov iskren trud.

U slučaju da imate bilo koju korekciju, komentar ili sugestiju u vezi ove publikacije, javite nam se na sljedeću adresu: info@et-taqwa.com

Izdavač:

ET-TAQWA WEB PUBLISHING

e-mail: info@et-taqwa.com

et-taqwa@hotmail.com

web page: www.et-taqwa.com

Uvod

U ime Allaha, Svemilosnog, Milostivog!

Sva hvala pripada Allahu, Gospodaru svjetova, Njega hvalimo, od Njega pomoć, oprost i uputu tražimo, Njemu se kajemo, kod Njega tražimo utočište od zla naših duša i naših loših djela.

Koga Allah iz Svoje milosti uputi, nema toga ko će ga u zabludu odvesti, a koga u zabludi pravedno ostavi, nema onoga koji će ga uputiti.

Svjedočim da nema istinskog boga koji zaslužuje da se obožava osim Allaha, i svjedočim da je Muhammed Njegov rob i Njegov poslanik, neka je Allahov salavat i selam na njega, njegovu porodicu, ashabe i sve koji ih budu slijedili u dobru do Sudnjega dana.

Uistinu, najistinitiji govor jeste Allahov govor a najbolja uputa je uputa Muhammeda, sallallahu alejhi ve sellem, dok su najgore stvari novine u vjeri jer je svaka novina novotarija a svaka novotarija je zabluda i stranputica!

Uzvišeni Allah rekao je:

يَا أَيُّهَا الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُوا إِلَّا وَأَنتُمْ مُسْلِمُونَ [٣:١٠٢]

"O vjernici, bojte se Allaha onako kako se treba bojati i umirite samo kao muslimani!" (Prijevod značenja sura Ali Imran, ajet broj 102).

يَا أَيُّهَا النَّاسُ اتَّقُوا رَبَّكُمُ الَّذِي خَلَقَكُمْ مِنْ نَفْسٍ وَاحِدَةٍ وَخَلَقَ مِنْهَا زَوْجَهَا وَبَثَّ مِنْهُمَا رِجَالًا كَثِيرًا وَنِسَاءً ۚ وَاتَّقُوا اللَّهَ الَّذِي تَسَاءَلُونَ بِهِ وَالْأَرْحَامَ ۚ إِنَّ اللَّهَ كَانَ عَلَيْكُمْ رَقِيبًا

[٤:١]

"O ljudi, bojte se Gospodara svoga, koji vas od jednog čovjeka stvara, a od njega je i drugu njegovu stvorio, i od njih dvoje mnoge muškarce i žene rasijao. I Allaha se bojte - s imenom čijim jedni druge molite - i rodbinske veze ne kidajte, jer Allah, zaista,

stalno nad vama bdi." (Prijevod značenja sura En-Nisa, ajet broj 1).

يَا أَيُّهَا الَّذِينَ آمَنُوا اتَّقُوا اللَّهَ وَقُولُوا قَوْلًا سَدِيدًا [٣٣:٧٠] يُصْلِحْ لَكُمْ أَعْمَالَكُمْ وَيَغْفِرْ لَكُمْ
ذُنُوبَكُمْ ۗ وَمَنْ يُطِيعِ اللَّهَ وَرَسُولَهُ فَقَدْ فَازَ فَوْزًا عَظِيمًا [٣٣:٧١]

**"O vjernici, bojte se Allaha i govorite samo istinu. On će vas za
vaša dobra djela nagraditi i grijehe vam vaše oprostiti. A onaj ko
se Allahu i Poslaniku Njegovu bude pokoravao - postići će ono
što bude želio."** (Prijevod značenja sura Al-Ahzab, ajet broj 70-71).

KAKO UČITI KUR'AN NAPAMET

Ovom prilikom, s dozvolom Uzvišenog Allaha, spomenut ćemo
najbolju isprobanu metodu za hifz (učenja napamet) Kur'ana.

Ova metoda odlikuje se nad drugim metodama jačinom hifza
kao i kratkoćom vremena, tj. praktikujući ovu metodu, čovjek će
završiti brzo Kur'an i njegov hifz Kur'ana bit će izuzetno čvrst.

Ovaj način hifza Kur'ana objasniti ćemo na prvoj stranici sure
El-Džumua. Mi ćemo navesti, da bismo što bolje pojasnili,
samo prijevod značenja umjesto arapskog teksta.

1) Učiš prvi ajet dvadeset puta.

**"Ono što je na nebesima i ono što je na Zemlji hvali
Allaha, Vladara, Svetoga, Silnoga, Mudroga!"**(El-Džumua,
1)

2) Učiš drugi ajet dvadeset puta.

**"On je neukima poslao Poslanika, jednog između njih, da
im ajete Njegove kazuje i da ih očisti i da ih Knjizi i**

mudrosti nauči, jer su prije bili u očitoj zabludi.” (El-Džumua, 2)

3) Učiš treći ajet dvadeset puta.

“...i drugima koji im se još nisu priključili – On je Silni i Mudri.” (El-Džumua, 3)

4) Učiš četvrti ajet dvadeset puta.

“To je Allahova milost koju On daje onome kome hoće – a u Allaha je milost velika.” (El-Džumua, 4)

5) Zatim ova četiri ajeta, od prvog do četvrtog, učiš dvadeset puta.

6) Nakon toga učiš peti ajet dvadeset puta.

“Oni kojima je naređeno da prema Tevratu postupaju, pa ne postupaju, slični su magarcu koji knjige nosi. O, kako su loši oni koji poriču Allahove ajete! A Allah neće ukazati na Pravi put narodu koji neće da vjeruje.” (El-Džumua, 5)

7) Učiš šesti ajet dvadeset puta.

“Reci: ‘O, jevreji, ako tvrdite da ste vi od ljudi jedini Allahovi miljenici, onda smrt poželite, ako istinu govorite.’” (El-Džumua, 6)

8) Učiš sedmi ajet dvadeset puta.

“A zbog onoga što ruke njihove čine neće je nikad poželjeti, Allah dobro zna nevjernike.” (El-Džumua, 7)

9) Učiš osmi ajet dvadeset puta.

“Reci: ‘Smrt od koje bježite zaista će vas stići. Zatim će te Onome koji poznaje i nevidljivi i vidljivi svijet vraćeni biti i On će vas o onome što ste radili obavijestiti.’” (El-Džumua, 8)

10) Učiš ova četiri ajeta, od petog do osmog ajeta, dvadeset puta.

11) Zatim, svih osam ajeta, od prvog do osmog, učiš dvadeset puta.

Na ovaj način uči svaku stranicu Kur'ana i dnevno ne prelazi više od jednog hizba (uglavnom oko dvije i po stranice), kako ti se ne bi nagomilalo naučeno i kako zbog nemogućnosti ponavljanja ne bi ostavio hifz Allahove Knjige.

ŠTA DA RADIM KADA HOĆU DA UČIM NOVU STRANICU?

Kada hoćeš da učiš novu stranicu na spomenuti način, dvadeset puta prouči staru stranicu, tj. prethodno naučenu, kako bi još jednom dobro utvrdio prethodnu stranicu. Nakon toga pređi na hifz nove stranice i uči je na spomenuti način.

KAKO DA SPOJIM HIFZ NOVIH STRANICA I PONAVLJANJE RANIJE NAUČENIH?

Nikako ne uči Kur'an napamet bez ponavljanja. Ukoliko bi naučio cijeli Kur'an, sve stranicu po stranicu, i htio da se vratiš na početak i ponoviš cijeli Kur'an, vidio bi da si većinu naučenog zaboravio. Prelijepa metoda za spajanje hifza novih stranica i ponavljanje starih jeste da podijeliš Kur'an na tri dijela. Svaki dio, dakle, sadrži deset džuzeva. Ukoliko u jednom danu učiš napamet jednu stranicu, obavezno ponavlaj četiri ranije naučene stranice. Tako čini sve dok ne naučiš prvih deset džuzeva. Kada naučiš deset džuzeva, prestani s učenjem novih stranica cijeli jedan mjesec. Za to vrijeme svaki dan ponavlaj po osam stranica. Nakon mjesec dana takvog ponavljanja, pređi na učenje novih stranica. Svaki dan uči po jednu ili dvije stranice, shodno svojim mogućnostima, i obavezno ponavlaj osam stranica iz prvih deset džuzeva. Tako čini sve dok ne naučiš još deset novih džuzeva, dakle, kada budeš znao dvadeset džuzeva Kur'ana, tada prestani s učenjem novih stranica puna dva mjeseca. Za to vrijeme od dva mjeseca, svaki dan ponavlaj po

osam stranica naučenog. Kada prođu dva mjeseca ponavljanja, pređi na učenje preostalih deset džuzeva Kur'ana. Svaki dan uči stranicu ili dvije, shodno svojim mogućnostima, i obavezno ponavlja osam stranica ranije naučenog. Kada naučiš i preostalih deset džuzeva, dakle, kada završiš cijeli Kur'an, vrati se i ponavlja samo prvih deset džuzeva cijeli mjesec. Svaki dan ponavlja po pola džuza, tj. deset stranica. Kada prođe mjesec dana takvog ponavljanja, pređi na ponavljanje drugih deset džuzeva, tj. od desetog do dvadesetog džuza. Svaki dan ponavlja po pola džuza od desetog do dvadesetog džuza i čitaj osam stranica od prvog do desetog džuza. Tako postupaj mjesec dana, a onda pređi na ponavljanje zadnjih deset džuzeva. Svaki dan ponavlja po pola džuza od ovih zadnjih deset džuzeva Kur'ana i čitaj osam stranica iz prvih i osam stranica iz drugih deset džuzeva.

KADA NA OVAJ NAČIN POSTEPENO PONOVI CIJELI KUR'AN, KAKO DA GA PONOVO PONAVLJAM CIJELOG?

Kada na ovaj način ponoviš cijeli Kur'an, vrati se i počni s novim ponavljanjem. Svaki dan ponavlja po dva džuza. Potrudi se da ta dva džuza ponoviš u danu tri puta, tako da za dvije sedmice ponoviš cijeli Kur'an, i s ovakvim načinom ponavljanja nastavi cijelu godinu.

Nakon godinu dana ponavljanja cijelog Kur'ana, tvoj dnevni hizb Kur'ana, tj. dio koji trebaš učiti dnevno, jeste onakav kakav je bio kod Allahovog Poslanika, sallallahu alejhi ve sellem. Poslanik, sallallahu alejhi ve sellem, dijelio bi Kur'an na sedam dijelova. Dakle, svakih sedam dana proučio bi Kur'an.

Evs b. Huzejfe kaže: "Upitao sam ashabe Allahovog Poslanika, sallallahu alejhi ve sellem: 'Kako dijelite Kur'an?', a oni su mi

odgovorili: "Tri sure, pet sura, sedam sura, devet sura, jedanaest sura i dio s kraćim surama od sure Kaf sve do kraja." (Ahmed)

- Znači, Allahov Poslanik, sallallahu alejhi ve sellem, prvi bi dan učio od sure El-Fatiha do kraja sure En-Nisa.
- Drugi dan: od sure El-Maida do kraja sure Et-Tevba.
- Treći dan: od sure Junus do kraja sure En-Neml.
- Četvrti dan: od sure El-Isra do kraja sure El-Furkan.
- Peti dan: od sure Eš-Šuara do kraja sure Jasin.
- Šesti dan: od sure Es-Saffat do kraja sure El-Hudžurat.
- I sedmi dan: od sure Kaf do kraja sure En-Nas.

Ovakav način podjele Kur'ana kod Allahovog Poslanika, sallallahu alejhi ve sellem, islamski su učenjaci sabrali u riječima ((فمي بشوق)).

Svaki harf ovih dviju riječi početak je hizba Allahovog Poslanika, sallallahu alejhi ve sellem, u novom danu.

Tako je harf ((ف)) u riječi ((فمي)) oznaka za suru El-Fatiha, tj. ukazuje da hizb Allahovog Poslanika u prvom danu počinje surom El-Fatiha.

Harf ((م)) upućuje da početak hizba u drugom danu počinje surom El-Maida.

Harf ((ي)) upućuje da hizb trećeg dana počinje surom Junus.

Harf ((ب)) u drugoj riječi ((بشوق)) upućuje da hizb četvrtog dana počinje surom Benu Israil, tj. surom El-Isra.

Harf ((ش)) upućuje da hizb petog dana počinje surom Eš-Šuara.

Harf ((و)) upućuje da hizb šestog dana počinje surom Es-Saffat.

Harf ((ق)) upućuje da hizb sedmog dana počinje surom Kaf i završava surom En-Nas.

KAKO DA RAZLIKUJEM SLIČNE AJETE U KUR'ANU?

Najbolji način razlikovanja sličnih ajeta jeste da, ukoliko ti se javi sličnost između dva ajeta, otvoriš mushaf i dobro pogledaš u oba ajeta. Gledaj postoji li ikakva razlika između ta dva ajeta, dobro razmisli i na sebi svojstven način postavi mjerilo ili granicu pomoću koje ćeš razlikovati ta dva slična ajeta. Tokom ponavljanja Kur'ana stalno uočavaj tu razliku, podsjećaj se na nju, sve dok ne otkloniš od sebe razlog koji te zbunjuje i dovodi do zamjene sličnih ajeta.

PRAVILA I OGRANIČENJA U HIFZU

- Tvoj hifz mora biti praćen od strane šejha koji će ispravljati tvoje učenje.
- Svaki dan uči napamet dvije stranice, jednu poslije sabaha, a drugu poslije ikindije ili akšama. Na ovaj način naučit ćeš napamet cijeli Kur'an i dobro ga utvrditi za samo jednu godinu. Ukoliko bi povećao broj stranica, tvoj bi hifz oslabio.

- Učenje Kur'ana napamet počinje od sure En-Nas do sure El-Bekara, jer je tako mnogo lakše, dok, kada naučiš cijeli Kur'an, ponavljat ćeš od sure El-Bekara do sure En-Nas.
- Hifz Kur'ana uči se iz jednog mushafa kako bi se hifz učvrstio i kako bi samo ponavljanje Kur'ana bilo olakšano, jer se na taj način lakše vratiti određenim ajetima, počecima i završecima stranica.
- Svako ko nauči Kur'an napamet, prve dvije godine počinje da zaboravlja naučeno. Ovaj period naziva se "period skupljanja". Nemoj da se žalostiš što ti odlazi naučeno, što ga zaboravljaš i mnogo griješiš tokom učenja. Uistinu je ovaj period težak i pun iskušenja. Svakako, šejtan ima udjela u svemu tome i nastoji da te odvrati od učenja Allahove Knjige. Budi svjestan toga, odbaci od sebe šejtanske vesvese i nastavi sa hifzom i ponavljanjem moleći Uzvišenog Allaha za podršku i pomoć.

Na ovaj način, uz Allahovu dozvolu, samo za godinu dana naučit ćeš i dobro utvrditi cijeli Kur'an.

Neka je svaka hvala Allahu, subhanehu ve te'ala, s čijom blagodat i završavaju se sva dobra djela! Neka je salavat i selam na Njegovog roba i poslanika Muhammeda, sallallahu alejhi ve sellem, na njegovu porodicu, supruge, potomke, sve ashabe i sve koji ih slijede u dobru do Sudnjega dana. Molim Te, Uzvišeni Allahu, da ovaj trud učiniš iskrenim radi Tvoga Plemenitog lica i da njime okoristiš Svoje robove. Slavljen neka si Ti, Gospodaru moj, i hvaljen. Nema istinskog boga osim Tebe. Od Tebe oprosta tražim i Tebi se kajem.

ŠEJH ABDULMUHSIN EL-KASIM

Sadržaj

Uvod	4
KAKO UČITI KUR'AN NAPAMET	5
<i>ŠTA DA RADIM KADA HOĆU DA UČIM NOVU STRANICU?</i>	7
<i>KAKO DA SPOJIM HIFZ NOVIH STRANICA I PONAVLJANJE RANIJE NAUČENIH?</i>	7
<i>KADA NA OVAJ NAČIN POSTEPENO PONOVI CIJELI KUR'AN, KAKO DA GA PONOVO PONAVLJAM CIJELO?</i>	8
<i>KAKO DA RAZLIKUJEM SLIČNE AJETE U KUR'ANU?</i>	10
PRAVILA I OGRANIČENJA U HIFZU	10



EHLEN WE SEHLEN

